



I. PRINCIPADO DE ASTURIAS

• OTRAS DISPOSICIONES

CONSEYERÍA D'EDUCACIÓN Y CULTURA

RESOLUCIÓN de 18 d'agostu del 2015, de la Conseyería d'Educación y Cultura, pola que se convoca'l premiu «Alfonso Iglesias» de Cómic en llingua asturiana.

Fomentar la creatividá lliteraria contribuye ensin duldá a desenvolver el conteníu cultural de la sociedá, sobre manera teniendo en cuenta la importancia de la lliteratura, en cualquiera de les tantes de manifestaciones que tien nel nuestro tiempu. Ye bien sabíu tamién que la escritura, que surde de la voluntá de creación y comunicación, lleva con ella un trabayu personal importante, una dedicación de tiempu y esfuerciu que, ensin ser midibles no económicu porque'l valir propiu de la lliteratura tresciende talos parámetros, sí que se puen reconocer y incentivar polos poderes públicos. Por ello, la Conseyería d'Educación y Cultura del Principáu d'Asturies vien convocando con calter anual dellos premios lliterarios dirixíos a consolidar, arriquecer y prestixar la llingua y cultura asturianas.

Fechos

Primeru.—Cola mira de meyorar les actuaciones pa llograr esti oxetivu, por Resolución de 23 de xunetu del 2015 (BOPA de 30 de xunetu del 2015), de la Conseyería d'Educación, Cultura y Deporte, apruébase la primer modificación de les bases de los premios «Xosefa Xovellanos» de Novela, «Xuan M.^º Acebal» de Poesía, «Máximo Fuertes Acevedo» d'Ensayu, «María Josefa Canellada» de Lliteratura Infantil/Xuvenil y «Alfonso Iglesias» de Cómic en llingua asturiana, que fueren aprobaes por Resolución d'esta Conseyería de 5 de marzu del 2009 (BOPA de 27 de marzu del 2009).

Segundu.—Na Llei del Principáu d'Asturies 11/2014, de 29 d'avientu, de Presupuestos Xenerales del Principáu d'Asturies pal 2015, hai creitu específicu pa estos fines na partida presupuestaria 14.04.422R-482.062, denomáu "Premios literarios en lengua asturiana". Y el Plan Estratéxicu de Subvenciones de la Conseyería d'Educación, Cultura y Deporte pal exerciciu 2015 (aprobáu por Resolución de 16 de febreru del 2015 y publicáu nel BOPA de 26 de febreru) prevé la convocatoria de los cinco gallardones mentaos. Procediendo, agora, la convocatoria d'esti premiu:

- Premiu «Alfonso Iglesias» de Cómic n'asturianu na so séptima edición, enfotaos en qu'actuaciones d'esti calter contribuyen de manera eficaz a dinamizar l'actividá cultural de la Comunidá Autónoma, y n'especial un aspectu bien importante de la mesma como ye'l de la creación lliteraria.

Terceru.—Acordies cola Resolución de 16 de mayu del 2005, de la Conseyería d'Economía y Alministración Pública, pola que s'establez el sistema d'información contable de l'Alministración del Principáu d'Asturies y el so sector públicu y s'aprueben les normes de los procedimientos de xestión, tramitación y réxime de contabilidá na execución del presupuestu de gastos, la Intervención Delegada, en data 31 de xunetu del 2015 emitió'l correspondiente informe fiscal favorable.

Fundamentos de derechu

Primeru.—L'artículu 3 del Decretu 71/92, de 29 d'ochobre, que regula'l Réxime Xeneral de Subvenciones, en rrellación col artículu 38 de la Llei 6/1984, de 5 de xunetu, del Presidente y del Conseyu de Gobiernu; l'artículu 5 del Decretu 6/2015, de 28 de xunetu, de Reestructuración de les Conseyerías qu'integren l'Alministración de la Comunidá Autónoma; el Decretu 65/2015, de 13 d'agostu, pol que s'establez la estructura orgánica básica de la Conseyería d'Educación y Cultura, mesmo que l'artículu 10 de la Llei 2/1995, de 13 de marzu, sobre Réxime Xurídicu de l'Alministración del Principáu d'Asturies; too ello no tocante a la determinación de les competencies y facultaes p'adoptar la presente Resolución.

Segundu.—L'artículu 41 del Testu Refundíu del Réxime Económicu y Presupuestariu del Principáu d'Asturies, aprobáu por Decretu Llexislativu 2/1998, de 25 de xunu, no que fai a la competencia de los titulares de les conseyerías p'autorizar y disponer los gastos propios de los servicios del so cargu y de los qu'estableza la Llei de Presupuestos Xenerales de cada exerciciu o, nel so defectu, la del exerciciu anterior, hasta la cuantía fixada nesta.

Terceru.—Ye aplicable lo estableció na Llei 38/2003, de 17 de payares, Xeneral de Subvenciones y el Decretu 71/1992, de 29 d'ochobre, sobre Réxime Xeneral de Concesión de Subvenciones.

En base a lo acabante esponer y acordies colo previsto nos artículos 8 c) y 41 del Testu Refundíu del Régime Económicu y Presupuestariu, aprobáu pol Decretu Llexislativu del Principáu d'Asturies 2/1998, de 25 de xunu, pola presente,

RESUELVO

Primeru.—Convocar esti premiu:

- «Alfonso Iglesias» de Cómic n'asturianu (séptima edición), con una dotación de 3.000 (tres mil) euros, pa obres d'estilu, tratamientu y tema llibres, pudiendo abarcar el desarrollu d'una historia única o un conxuntu d'histories



(rellacionaes o non ente sigo). Pa participar habrá presentase un proyectu inicial con una estensión mínima de quince páxines.

Les obres presentaes habrán ser inédites y non premiaes n'otros concursos.

La estensión total de la obra habrá tener un mínimu de 50 páxines.

Segundu.—Autorizar un gastu por importe de 3.000 (tres mil) euros con cargu a l'aplicación presupuestaria 14.04.422R-482.062 de los Presupuestos Xenerales del Principáu d'Asturies pal 2015.

Terceru.—Esta convocatoria va mandase poles bases reguladores aprobaes por Resolución de 5 de marzu del 2009 (BOPA de 27 de marzu del 2009) de la Conseyería de Cultura y Turismu modificaes pola Resolución de 23 de xunetu del 2015, de la Conseyería d'Educación, Cultura y Deporte, pola que s'aprueba la primer modificación de les bases de los premios «Xosefa Xovellanos» de Novela, «Xuan M.^a Acebal» de Poesía, «Máximo Fuertes Acevedo» d'Ensayu, «María Josefa Canellada» de Lliteratura Infantil/Xuvenil y «Alfonso Iglesias» de Cómic en llingua asturiana (BOPA de 30 de xunetu del 2015).

Cuartu.—Presentación d'orixinales, sitiu y plazu.

Les obres que se presenten a esti Premiu «Alfonso Iglesias» de Cómic n'asturianu tienen de presentase en formatu dixital y en papel (tamaños almitidos: A4 y A3).

Les obres tienen que se presentar nel Rexistru Xeneral Central de l'Alministración del Principáu d'Asturies (Edificiu Alministrativu, c/ Coronel Aranda, e/n, planta plaza, sector central, Uviéu) hasta'l día 10 d'ochobre –inclusive– del 2015, en dos sobres cerraos onde tien que s'escribir el nome del Premiu y tien que facer constar el títulu de la obra y l'alcuñu del autor. Caún de los sobres tien qu'incluyir:

Sobre A: datos del autor/a (señes, teléfonu y un currículum d'estensión curtia);

Sobre B: orixinal y cuatro copies del testu (en formatu papel).

Tamién pue presentase esta documentación por cualquiera de los sistemes establecíos n'artículu 38 de la Llei de Réxime Xurídicu de les Alministraciones Públiques y del Procedimientu Alministrativu Común. Si usando esti derechu la solicitú únviase per corréu, habrá que la presentar en sobre abiertu pa que'l personal de correos feche y selle la solicitú primero de que se certifique.

Quintu.—Los premios van ser concedíos acordies colos principios d'oxetividá, tresparencia, igualdá, non discriminación y publicidá, per aciu del procedimientu de concurrencia competitiva.

Sestu.—El Serviciu de Planificación Llingüística y Normalización, dependiente de la Conseyería d'Educación y Cultura, va adoptar toles midies necesaries pal desarrollu de les bases y d'esta convocatoria, llevando alantre la ordenación y instrucción del procedimientu. El conseyeru d'Educación y Cultura va dictar la resolución de concesión, que va publicase nel Boletín Oficial del Principáu d'Asturies, colo que va considerase notificada acordies lo establecío n'artículu 59.6b) de la Llei 30/92, de 26 de payares.

Séptimu.—Ordenar la publicación d'esta Resolución nel *Boletín Oficial del Principáu d'Asturies*.

Octavu.—Esta Resolución termina la vía alministrativa y va poder ser recurrida potestativamente en reposición, énte la consejera d'Educación y Cultura, nel plazu d'un mes computáu dende'l día siguiente al de publicación d'esta resolución nel Boletín Oficial del Principáu d'Asturies, o ser directamente impugnada énte la Sala de lo Contencioso-Alministrativu del Tribunal Superior de Xusticia d'Asturies, nel plazu de dos meses contaos dende la publicación de la resolución, ensin perjuiciu de cualesquier otru recursu que consideren procedente interponer na defensa de los sos intereses.

Oviedo, a 18 d'agostu del 2015.—El Conseyeru d'Educación y Cultura, Genaro Alonso Megido.—Cód. 2015-13726.